

**TEZAUUR LITURGIC**  
**23 DECEMBRIE**

**ACATISTUL**  
**SF. IERARH**  
**NIFON,**  
**EPISCOPUL**  
**CONSTANȚIANEI**  
**EGIPTULUI**



**MOSCOVA, 2000**



# Акафист преподобному Нифонту, епископу Констанции

## Кондак 1

Избранный Христом Сыном Божиим на прославление неизреченного Его милосердия к кающимся грешником, сподобльшийся ходатайства и заступления Пресвятыя Девы Богородицы, приими от нас, недостойных, восхваление:

Радуйся, отче Нифонте достоблаженный!

## Икос 1

Ангел Хранитель, приставленный от Бога на хранение души, возрадовася о твоём обращении от тмения страстей на путь добродетельного жития, и с ним вси святии Ангели, по неложному словеси Христову: «яко велия радость бывает на Небеси о едином грешнице кающемся». Сего ради и мы, грешнии, радуящеся о несказанном благоутробии Божиим, похвальная восписуем ти, отче наш Нифонте, сице:

Радуйся, неизреченное милосердие Божие к кающимся грешником познавший;

Радуйся, и нам, грешным, образ покаяния собою подавший.

Радуйся, Споручницу спасения, Матерь Божию, стяжавший;

Радуйся, по Апостолу: «позор Ангелом и человеком бывший» .

Радуйся, из глубины рова страстей изшедший;

Радуйся, ко спасительному покаянию прибегший.

Радуйся, тину от умных очес отрясший;

Радуйся, ко свету благодати Божией прозревший.

Радуйся, зловония смрадных дел греховных избегший;

Радуйся, обоняние Христова благоухания вкусивший.

Радуйся, радость Ангелом сотворивший;

Радуйся, сатану до конца посрамивший.

Радуйся, отче Нифонте достоблаженный!

## **Кондак 2**

Видяще, преподобне отче Нифонте, величие милосердия Божия к кающимся грешником, на тебе совершившееся, и мы, грешнии и недостойнии, дерзаем взывати к Спасителю Богу: Аллилуия!

## **Икос 2**

Разум лжеименный, во еже в мирских сластех влатися, отвергл еси, отче Нифонте, разум же благий, во еже последовати доброму совету

мирскаго друга твоего, Никодима, восприял еси, егда он, на тя со ужасом взирая, сказа тебе: «Яко лице твое, аки мурин черно, от внутренних страстей являшеся». Ты же, о сем усрамявися, в познание самого себе прииде. Того ради зываем к тебе таковая:

Радуйся, добраго друга в Никодиме обретший;

Радуйся увещание его смиренно приявший.

Радуйся, обличение тебе в лице незлобиво и кротко послушавый;

Радуйся обличения сего усрамявися.

Радуйся, оставити погубительное во страстех житие помысливший;

Радуйся, всепагубную лесьть мира сего уразумеый.

Радуйся, всю развращенную жизнь пред умными очесы твоими представивый;

Радуйся, «начало Премудрости — Страх Господень» в сердце твоем приемший.

Радуйся, вся красная мира сего, яко уметы вменивый;

Радуйся, начало обращения к Богу положивый.

Радуйся, вся страсти мирския омерзивый;

Радуйся, к покаянию усердно прибегший.

Радуйся, отче Нифонте достоблаженный!

### **Кондак 3**

Сила Вышняго осени тя, отче Нифонте, лучею благодати озарив сердце твое, во еже

прибегнути к молитве. Ты же, противоборствуя злым помыслом, глаголаше в себе: «Егда живях блудно, никое же зло сретете мя, ныне же, егда хочу к Богу обратиться, кое зло пострадати имам». Тем же, таковому твоему любомудрию удивляющися, из глубины души взываем к Богу: Аллилуия!

### **Икос 3**

Имуще богоприятную мысль обратиться к Богу, вшел еси во внутреннюю храмину свою, к стенанию и плачу обратился еси. Того ради сице тебе вопити дерзаем:

Радуйся, во внутренней храмине телом затворивыйся;

Радуйся, внутреннюю глубину сердца твоего к покаянию отверзый.

Радуйся, восхождение в сердце твоём к Богу полагавший;

Радуйся, с мытарем в перси своя бивавший.

Радуйся, «множество содеянных лютых помышлявший»;

Радуйся, яко нестерпиме гнев Божий, еже на грешники нераскаянные размышлявший.

Радуйся, яко страшно есть, еже впасти в руке Бога Живаго вразумивший;

Радуйся об ответе на Страшном Суде Христове тогда во уме приведший.

Радуйся, слезные токи от очей изливавший;

Радуйся, Давидски постелю слезами своими омочивший.

Радуйся, стенания из глубины души испущавший;

Радуйся, воздыхании сердечными Бога на милость к себе приклонивший.

Радуйся, отче Нифонте достоблаженный!

#### **Кондак 4**

Буря зельная нападений бесовских объят ты, отче Нифонте, ты же, яко адамант твердый, в терпении твоём пребывал еси, крепко вопия к Создателю Богу: Аллилуия!

#### **Икос 4**

Слышаще внутренний помысл, к церкви ты зовущий, ты, отче Нифонте, потекл еси, и ко иконе Пречистыя Девы Богородицы, усердно взирая, слезные токи изливал еси. Тем же и мы, слышаще сия, со умилением взываем ти таковая:

Радуйся, к Матери Божией прибегший;

Радуйся, Ходатаицу о спасении грешных Ю познавший.

Радуйся, Надежду ненадежным Ю уразумевший;

Радуйся, Покров Божией Матери стяжавший.

Радуйся, смирением своим на милость Ее приклонивший;

Радуйся, Помощницу Ю и Заступницу у Сына и

Бога Своего о тебе обретший.

Радуйся, «помилуй мя, Заступнице христианом»  
возопивший,

Радуйся, пред иконою Ея из глубины души  
возстенавший.

Радуйся, видев Икону Ея, аки склабящуюся,  
духовныя радости исполнившийся;

Радуйся, яко отсюда благодушество  
восприемший.

Радуйся, оттоле всегда Имя Ея Пресвятое во  
устах и в сердце обносивый;

Радуйся, выну в обстоятельствах Помощницу Ю себе  
стяжавший.

Радуйся, отче Нифонте достоблаженный!

### **Кондак 5**

Боготечной звезде уподобился еси, отче наш,  
Нифонте богомудре, яко же бо звезда тече к  
Вифлеему, наставляя волхвов на поклонение  
рождшемуся Христу, тако и ты притекал еси к  
Споручнице спасения твоего, Владычице, вопия  
к Богу: Аллилуия!

### **Икос 5**

Видеша отроцы Халдейстии на руку Девичу  
Создаваго рукама человеки, видел еси и ты,  
отче Нифонте, в болезни сый, посещение тя  
багрянницею одеянная Владычицы мира со  
святою Анастасиею Узорешительницею,

исцелити тя пришедшую. Сего ради ублажаем  
тя, сице поюще:

Радуйся, болезнию от Бога посещенный;

Радуйся, благодушно оную терпевый.

Радуйся, в болезни ничтоже иное, токмо «Слава  
Тебе Боже!» глаголавый;

Радуйся, и сие: «Слава Помощнице моей,  
Пречистой Деве Марии» вещавый.

Радуйся, помазание елеем от кандила  
приемший;

Радуйся, знамение милосердия Божия тем  
познавший.

Радуйся, сим духовным врачеством исцеленный;

Радуйся, чудесно от одра болезненного  
возставший.

Радуйся, попечение о тебе Пречистыя  
Богоматере познавший;

Радуйся, с благодарением в церковь Божию  
притекший.

Радуйся, в день Преполовления Пасхи Святых  
Тайн приобщения сподобившийся;

Радуйся, от того времени иноческое житие  
восприемший.

Радуйся, отче Нифонте достоблаженный!

### **Кондак 6**

Проповедник милосердия Божия и Пречистыя  
Девы Богородицы Матерняго благоутробия к  
кающимся искренно грешником ты явился еси,

преподобне отче наш Нифонте, да и мы, многогрешные, последуем великому примеру твоего покаяния, взывая Богу: Аллилуия!

## **Икос 6**

Возсиявый во Египте просвещение Истины и отгнавый лжи тьму, Христос Господь благоволи возсияти и в души твоей, Нифонте блаженне, своею благодатию, и отгнати темный облак лукаваго, нашедший на тя, тебя же из раба плоти и греха сотвори великаго Себе угодника.

Сего ради, радуящися духом, взываем ти сице:

Радуйся, помощи Божия сподобльшийся,

Радуйся, осияние благодати Святаго Духа приявший.

Радуйся, ярем Христов на ся взявший;

Радуйся, иго благое Христово понесший.

Радуйся, бремя легкое иисусово восприемший;

Радуйся, во броня правды Христовой облекшийся.

Радуйся, на камени делания заповедей Божиих себе утвердивший;

Радуйся, щитом веры себе оградивший.

Радуйся, в нем вся стрелы лукаваго, разженныя, угасивший;

Радуйся, шлем спасения восприявший.

Радуйся, духа хульнаго, глаголющаго: «Несть Бога» посрамивший;

Радуйся, яко добр воин Христов над

вражескими мечтаниями и страхованием победу о Христе одержавший.

Радуйся, отче Нифонте достоблаженный!

### **Кондак 7**

Хотящу Спасителю всего мира подати нам, грешным, образ милосердия своего к кающимся, да познаем, яко несть грех побеждающъ человеколюбие Его, ибо «удиви в тебе», преподобне Нифонте, «вся хотения Своя», ты же воспевал еси немолчно Богу: Аллилуия!

### **Икос 7**

Новые подвиги умерщвления плоти и самоотвержения показал еси, отче Нифонте, за прежде содеянные грехи, «творя плоды, достойны покаяния», тем же согласно вопием ти таковая:

Радуйся, аще и не в обители быв, но жестокое иноческое житие приемый;

Радуйся, храмину твою келлиею монашескою сотворивый.

Радуйся, зельным пощением плоть свою умерщлявый;

Радуйся, воду пред очесы токмо поставляя, жажду терпевый.

Радуйся, не о брашне, но о всяком глаголе, исходящем изо уст Божиих, помышлявый;

Радуйся, ранами Христа ради тело твое

удручавый.

Радуйся, не глаголения ради праздных словес  
камень себе во уста влагавый;

Радуйся, ко Всенощному бдению притекавый.

Радуйся, сну, яко рабу повелевавый;

Радуйся, самовольный мученик явивыйся.

Радуйся, плоть твою Духови покоривый;

Радуйся, над страстями воцаривыйся.

Радуйся, отче Нифонте достоблаженный!

### **Кондак 8**

Странное и чудное промышление о нас Творца и  
Владыки Бога, яко тебе, преподобне отче  
Нифонте, из сосуда нечестия содела благодатию  
Своею сосуд Духу Святому, ты же в радости  
духовней воспевал еси Ему: Аллилуия!

### **Икос 8**

Весь бе в нижних и вышних Христос Господь,  
Бог наш, седяй бо одесную Отца, благоволи  
явиться тебе, прехвальный отче Нифонте, в  
видении объемля тя, яко чадолюбивый отец  
блуднаго сына. Тем же, таковому великому  
чудеси удивляющесе, со страхом и любовию  
вопием ти сице:

Радуйся, терпением твоим всю немощную силу  
вражию посрамивый;

Радуйся, покаянием твоим Бога на милость  
преклонивый.

Радуйся, смирением твоим на высоту добродетельнаго жития возшедший;  
Радуйся, Отца Небеснаго благоутробие познавший.

Радуйся, объятий чадолюбиваго Отца сподобльшийся;

Радуйся, подобно блудному сыну, любезно им приятый.

Радуйся, глас Его отеческий слышавший;

Радуйся, ожидание Его твоего к Нему обращения познавший.

Радуйся, тем Божественным видением услажденный;

Радуйся, сим о прощении прежних грехов твоих извещенный.

Радуйся, по видении том слезы многи от радости душевныя излиывший;

Радуйся, тайну сию на прославление милосердия Божия ученику твоему поведавший.

Радуйся, отче Нифонте достоблаженный!

### **Кондак 9**

Всякое естество, не токмо человеческое, но и ангельское удивися, яко за премногая твоя, преподобне отче Нифонте, борения с лукавыми бесы, дадеся тебе от Бога власть над ними: егда бо они, яко до тысящи нападоша на тя, ты же невидимою силою Божиею дал еси им по тысящи ран каждому, дондеже обещахуся с

клятвою, яко идеже имя Нифонтово  
вспоманется, ни же приблизитися к месту  
тому, ты же во смирении взывал еси ко  
Всемогущему Богу: Аллилуия!

## **Икос 9**

Витии многовещанные риторскими своими  
языки не возмогут достождно восхвалити твоя  
подвиги и чудеса, прехвальне отче Нифонте, мы  
же, любовию к тебе побеждаеми, во смирении  
нашем ублажаем тя сице:

Радуйся, по безчисленных твоих подвигах и  
трудех чудотворения дар от Бога приемый;

Радуйся, чудотворец и врач недугов  
человеческих явивыйся.

Радуйся, жены некия зельную зубную болезнь  
помазанием святым елеем исцеливый;

Радуйся, брата некоего, хульными помыслы  
обуреваема, советом твоим ободривый.

Радуйся, многая и преславная чудеса  
благодатию Божию сотворивый;

Радуйся, чудес творение не своему благочестию  
и силе, но единому Богу приписуай.

Радуйся, прозорливства дара сподобльшийся;

Радуйся, о прехождении по смерти душ  
человеческих откровение приемший.

Радуйся, достойных преставления на Небо  
зряци, духом веселивыйся;

Радуйся, недостойных отвержение во ад с

болезнию души оплакавый.

Радуйся, истязание душ на воздушных  
мытарствах зревый;

Радуйся, милосердием Божиим искупаемых и  
оправдаемых зреый.

Радуйся, отче Нифонте достоблаженный!

### **Кондак 10**

Спасти хотя душу твою, о теле твоём всячески  
небрегл еси, отче, досточудный Нифонте, но в  
Богомыслие ум твой присно вперяя, сподобился  
еси ангельского видения и изливания мира на  
честную главу твою, тем же благоухания  
небеснаго исполнился, взывал еси к Богу:

Аллилуия!

### **Икос 10**

Стена есть девам Богородице Дево и всем, с  
верою к Ней притекающим, иже и ты,  
преподобне отче Нифонте, стяжал еси себе стену  
и ограждение от всех навет вражиих. Тем же,  
подобая милосердию Царицы Небесной, и ты  
явился нам, грешным, стена и ограждение от  
злокоченных душетленных врагов. Сего ради,  
приглашаем тебе сицевая:

Радуйся, милосердие Царицы Небесной на себе  
познавший;

Радуйся, благоутробию Ея подражати  
тщавшийся,

Радуйся, болящия уврачевавый;  
Радуйся, немощныя подкрепивый.  
Радуйся, обуреваемых страстьми молитвами  
твоими в тишину душевную устроиый;  
Радуйся, бесы от человек отгнавый.  
Радуйся, грешников на пути спасения  
наставляяй;  
Радуйся, собою им неложный пример подавый.  
Радуйся, многоплетенная сети вражия ясно  
зревый;  
Радуйся, вся оная молитвою твоею, яко паучину  
растерзавый.  
Радуйся, и о нас, грешных, к Богу  
молитвенниче;  
Радуйся, и нам, воспевающим память твою,  
помощниче.  
Радуйся, отче Нифонте достоблаженный!

### **Кондак 11**

Пение всякое побеждается величием подвигов и чудес твоих, всехвальный отче наш Нифонте, но и сего, да не премолчим, яко в видении зрел еси Апостола Павла, повелевающа тебе пасти царския овцы, еже прознаменоваше твое на Архиерейский престол возведение, того ради, прославляемому тобою Богу вопием немолчно: Аллилуия!

## Икос 11

Светозарную свещу, поставленную на свещнице Церкви Христовой, зрим тебе, отче святителю Нифонте, — «не можаше бо светильник быти сокровен под спудом». Сего ради, похвальная восписуем ти, сице поюще:

Радуйся, бегая славы человеческия, смотрением Божиим во Александрию пришедший;

Радуйся, яко Патриарху Александру о тебе бысть откровение Божие.

Радуйся, яко зраком лица подобен был еси святому Апостолу Павлу;

Радуйся, яко подобно ему, и ты был еси сосуд избранный.

Радуйся, яко святой Архидиакон Афанасий виде Ангела, тебе сопутствующа;

Радуйся, яко он же узре «на главе твоей венец от камене честна».

Радуйся, во вся степени церковныя по чину посвященный;

Радуйся, во епископа Констанции, града Кипрскаго, хиротонисанный.

Радуйся, вся люди паствы твоея о сем возвеселивый;

Радуйся, с честью на престол твой препровожденный.

Радуйся, о врученной тебе Богом пастве зело прилежавый;

Радуйся, мысленные волки от нея отгнавый.  
Радуйся, отче Нифонте достоблаженный!

### **Кондак 12**

Благодать посвящения Архиерейскаго, аще и не  
хотяще, но обаче достойне приял еси, святителю  
Нифонте, и был еси истинный отец пастве  
твоей, яко же око слепым и нога хромым, горя  
бо духом, яко светильник великий, воспевал еси  
Богу: Аллилуия!

### **Икос 12**

Поюще великое и дивное житие твое, святителю  
отче Нифонте, воспоминаем и блаженную  
кончину твою, со слезами сердечными  
воспевающе:

Радуйся, во иерарсех достойный;

Радуйся, во святителях преизящный.

Радуйся, пред святою кончиною твоею болезнь  
телесную благодушно терпевый;

Радуйся, яко злато в горниле искусивыйся.

Радуйся, Патриархом святым Афанасием  
посещенный;

Радуйся, беседою его услажденный.

Радуйся, пришествием ангелов утешенный;

Радуйся, на преставление твое пришедший лик  
мучеников видевый.

Радуйся, на скончании твоём сонм пророков  
зревый;

Радуйся, на последнее целование твое Собор  
всех Святых грядущий зревый.

Радуйся, на приятие праведныя души твоя  
посещения Святых, Святейшия Матери Божия  
сподобльшийся;

Радуйся, просветивыйся лицом, яко солнце, и  
предавший в руце Господни дух твой.

Радуйся, отче Нифонте достоблаженный!

### **Кондак 13**

О, всехвальный и достоблаженнейший отче наш,  
святителю Нифонте, яко же в житии твоём  
многая искушения от диавола претерпевый и  
благодатию Божиею его до конца низложивый.  
Сице и нам, искушаемым, подаждь молитвами  
твоими, милосердием же Божиим помощь, и по  
кончине нашей от воздушных мытарств  
избавление, да со всеми покаявшимися  
грешники и мы сподобимся достигнути  
Царствия Небеснаго, и с тобою, ходатаем  
нашим, во веки веков воспевати Богу песнь  
Ангельскую: Аллилуия!



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НУЖЕ  
НЕБО**